

# MARO ANN OTRO DANIEL

## PERSON KARET LANN-HUON

O tud vad ker Lann-huon, chilouet, me ho ped,  
 Daéro a zo em c'halon, kanan ne hallan ket ;  
 Maro ec'h e hon ferson, ann Otro DANIEL,  
 Eunn den oa meurbet gwiek, hag eur belek zantel.

Dre-holl e voar enn kanvo, dre-holl voar glac'haret,  
 Pa glever ec'h eo maro hon zad muian-karet.  
 Tri bloaz ha tregont-zo, oa e ker Lann-huon ;  
 Er barouz e oa ganet e teuaz da berson.

Gand ann holl e oa karet a dost evel a bell ;  
 Piou oa mignon ann Eskop ? Ann Otro DANIEL.  
 Pet gwech eo bet diredet evid hen enori.  
 Arruout a re bep gwech, ma teuet d'hen pidi.

Hon Eskop a wie skler oa eul labourer mad.  
 Da daër heur euz ar beure, vije bemde war droad ;  
 O kovez hag o kelen, oc'h ober aluzen.  
 Ar paour, mar nije kalon, n'hen ankoeje biken.

Paëan re kalz a dier, ha diskin etajo ;  
 D'ann holl a oa ezomek roe aluzenno.  
 Rust a oa barz er gador, mes mad euz pep-unan ;  
 Ha vit zikour ar pec'her oa didamant d'he boan.

Biken na vije klevet o komz euz den abet ;  
 Dibonner oa he gomzo, karantezuz meurbet.  
 Bepret e vije joauz, hano nn'holl a wie  
 El lec'h ma oa tremenet, e Treger, e Kerne.

He zor oa bepret digor vid ann holl veleien,  
Ha d'hen gwelet e teuent, a bep tu, a vanden.  
A galon vad ho gwele o tont betek he di,  
Ha bepret eur gir joauz nefoa vid pep hini.

Empad ar c'holera braz, hep aoun rag ar c'hlanvet,  
E kichen ar c'hanvourien, dalc'h mad vije kavet.  
Ar groaz a enor neuze a oe d'ehan roet;  
Den n'he deuz biskoaz muioc'h a dra zur meritet.

Pa vinigas ann Eskop hent houarn Lann-huon,  
E c'hoantaaz a neve enori hon ferson.  
Kroaz aour ar vikelet vraz a lak enn he gerc'hen,  
Dirag eur bobl niveruz a oa war ann dachen.

Ar groaz-se oa penn-herez evid ar Bersonet,  
Ann holl a lar trugare d'ann Eskop biniget.  
Enor oa d'hon fastor, enor d'he vugale ;  
Kerzomp holl war he roujo bete fin hon bue.

Kammed vije dilabour; o lenn pe o pidi,  
Gand eur memor evuruz buan helle diskî.  
Lizerio ken kaër zant Paul, hag ar skritur zantei  
Oa moulet enn he speret, bete ma renk mervel.

Doue a zeu d'hen gervel ; den na vezò ankoet.  
Pedomp nin holl evit-han, enn amzer da zonet.  
Karg ar beleg zo pounner ; pedomp vid he ine,  
Ma ielo da ziskuizan da Varadoz Doue.

Bea a voann he vignon aboue pell amzer-zo ;  
He ven-be m'oa kizellet pell arog he varo.  
Breman e man er vered ; prestik in d'he gichen.  
D'ho pastor karantezuz, ha d'in rofet peden.

Amen.

Y. HERNOT.

# MARO ANN OTRO AUGUSTIN DAVID

## ESKOP KARET ZANT-BRIEK HA TREGER

A boan ec'h e dizec'het daëro ma daoulagat,  
E klevan ec'h eo maro, zivoaz ! hon Eskop mad.  
Kanko zo e Zant-Brieck, kanko e Lann-huon.  
Ma c'halon a zo poaniet ; na neo ket hep rezon.

En hon zouez ugent vla-zo, digaset gant Doue  
Noz ha de, e labouraz, didamant d'he vue.  
Dre-holl enn he Eskopti ec'h e da labourad,  
He zaouarn leun a c'hraso dre-holl a re ar vad.

Piou a hellfe niveri ar beajo neuz gret !  
Hag he obero zantel, hep diskuan kammet !  
Eur galon aour a nefoa, komzo madelezuz,  
Eunn Eskop meurbet gwiek, kalonnek, studiuze.

Ar vrétonet a garrie bete diskin ho iez ;  
Gant-he ive oa karet, e ker vel war ar mez,  
E Treger hag e Kerne, pep unan hen c'harrie,  
Ha gant he holl vadelez ann holl a c'honee.

Pa gafe artizanet habil enn ho micher,  
Eur vadelez ar vrassan a nefoa nn'ho c'hever.  
Ho c'harga re a enor hag a bep madelez ;  
Kavet eunn all evel-t-han, a gredan ve diez.

## X. HERNOT

ENN HE AMZER ZO ZAVET ILIZO HA KROAJO,  
KOUANCHO HA TIER SKOLL, LEIZ A BRESBITOARIO,  
HA DRE-HOLL E VÔA LABOUR VID ANN ARTIZANET ;  
KREDET, ANN ESKOP ZANTEL GANT-HE A OA KARET.

He ialc'h evel he galon a oa digor bepret ;  
Ar paour a oa he vignon, hag ann emzivadet ;  
Ar vugale a garrie, pep tra re evit-he,  
Zellet skolach Landreger, hini Plougerneve.

Ar Frerien, ar Seurezet vije nerzet gant-han ;  
Skolia mad hon bugale a reont hep skuizan,  
Diskin d'he karet Doue, enori tad ha mamm ;  
Ar vad dalc'hont da ober, hag hep diskuizan tamm.

Aluzenno kaër a gase d'hon zad, ar Pap zantel ;  
Nao gwech ec'h ez d'hen gwelet, arog dont da vervel.  
Ha kalz euz he Eskopti ac'h e ive gant-han ;  
Hag hen klanv braz, ec'h eaz ar veaj diwean.

Hag a arc'hant dastumet evit Breuriez ar Fe !  
Evuruz oa he galon, o welet kement-se,  
O welet he Eskopti ebarz ar renk kentan,  
Hag o c'honit ineo barz ar broio pellan.

Eur c'hlenvet hir ha poaniuz a bell-zo hen uze,  
Kinnig ra gant joausdet he boanio da Zoue.  
Mes he nerz zeu da vankout, ma koue didan ar zamm,  
Ann holl a zo glac'haret ha karget a estlamm.

Pa erruaz ar c'helio oa marv ann Eskop mad,  
Ann holl a oa glac'haret, daëro nn'ho daoulagat,  
Hag a lavar nn'eur woela, pedomp vid he ine,  
Ma ielo da ziskuizan da Varadoz Doue.

Eleiz ann hencho houarn a vern ver diredet,  
Ha da bidi evit-han, rog ma vo douaret,  
ENN Iliz Veur, er chapel honn Mamm, zantez Anna,  
E laket he relego e peuc'h da ziskuiza.

Amen.

Y. HERNOT.